

Donnavventura 2011: Italianina 7 vavy hitety an'i Madagasikara

I Madagasikara indray no firenena handray ilay mpamokatra fandaharana amin'ny televiziona italianina « Donnavventura ». Hanatanteraka fitetezam-paritra eto amintsika ny « Donnavventura », ny 23 aogositra hatramin'ny 1 oktobra izao, izany hoe, mandritra ny iray volana sy tapany eo ho eo. Italianina fito vavy (Giorgia, Jennifer, Margherita, Michela, Veronica sy Ana ary Chiara) no voafantina tamin'ireo tanora anarivony nilatsaka hofidina tany Italia, hiatrika ity fitsidihana horaketina an-tsary ity. Marihina fa midika hoe vehivavy mandehandeha sy tia karokaroka (aventure) no dikan'ny teny italianina Donnavventura. Fiara 4 x 4 efatra, mitondra ny marika Mitsubishi, avy amin'ny orinasa mpaninjara Sicam no hampiasaina, ny Air Madagascar no mpiara-miombon'antoka amin'ny fitaterana an'habakabaka anatin'ny, ny Hotelplan no hikarakara ny fiantranoana. Mpiara-miombon'antoka amin'ny fanatontosana ny fandaharana kosa ny Ofisim-pirenen'ny fizahantany eto Madagasikara (Ontm). Hitety ny toerana mahasarika mpizahatany Ny tapany Atsinanana (Sainte Marie) no handehanan'izy ireo voalohany miala eto Antananarivo, avy eo mihazo ny ilany Atsimo (Morondava, Tsingin'i Bemaraha, Ambalavao, Ranohira, Isalo, Toliara) ary miampita any amin'ny ilany Avaratra (Antsiranana, Nosy Be) ary faranana eto Antananarivo. Tanjon'ny « Donnavventura » ny hizaha ny Ranomasimbe Indianina izay miala eto Madagasikara mankany, Dubai, Emirats Arabes Unis ary Oman. Tafiditra ao anatin'ny fampiroboroboana ny fizahantany eto Madagasikara ity hetsika iray ity. Amin'ny ankapobeny, miarin-doha tsikelikely ity sehatra ity na eo aza ny krizy politika tsy misy farany. Nahatratra 17.644 ny italianina nitsidika teto amintsika tamin'ny taona 2010, manome 9%-n'ny mpizahatany manontolo, ary laharana faharoa aorian'ny frantsay sy ny renioney. Tamin'ny enim-bolana voalohany an'ity taona ity, 100.692 ny vahiny tonga teto Madagasikara, raha 86.803 ny tamin'ny taon-dasa nandritra io fe-potoana io, nahitana fitomboana 16%.